

दिनांक 10.07.2025

समय: 18.45 बजे

आकाशवाणी जयपुर—अजमेर
प्रादेशिक समाचार

- केन्द्रीय शिक्षा मंत्री धर्मेन्द्र प्रधान कया—विकसित भारत रा लक्ष्य ने हासिल करबा मांय विश्वविद्यालयां री महताऊ भूमिका।
- मुख्य सचिव सुधांशु पंत **सिंगल यूज प्लास्टिक** ने काम मांय लेबा सारू पूरी भांत रोक लगाबा माथे जोर दिया।
- गुरु पूर्णिमा रे मौके आज प्रदेशभर मांय केई कार्यक्रम राख्या जा रिया है।
- प्रदेश मांय केई ठोड़ां माथे जोरदार मेह बरसबा रो दौर जारी—27 जिलां खातर बारिश रो येलो अलर्ट।

000

केंद्रीय शिक्षा मंत्री धर्मेन्द्र प्रधान कया के विकसित भारत रा लक्ष्य ने हासिल करबा मांय विश्वविद्यालय महत्वपूर्ण भूमिका निभावे है। आज गुजरात रा केवडिया मांय केंद्रीय विश्वविद्यालयां रा कुलपतियां रा दो दिन रा सम्मेलन रा उद्घाटन रे मौके श्री प्रधान या बात कही। वणा कया के लारला एक दशक मांय देश रा उच्च शिक्षा ढांचा मांय घणो बदलाव आयो है।

.....
इण सम्मेलन मांय बहुमुखी अर समग्र शिक्षा, अनुसंधान, नवाचार अर चिंतन कौशल विकास अर शिक्षा मांय प्रौद्योगिकी रा एकीकरण जेड़ा मुद्दा माथे चर्चा करी गई। ओ सम्मेलन शिक्षा मंत्रालय कानी ऊं नई राष्ट्रीय शिक्षा नीति रा कार्यान्वयन ने और बत्तो गतिशील बणाबा रा मकसद सूं राख्यो गयो है।

000

सर्वोच्च न्यायालय निर्वाचन आयोग ने बिहार मांय मतदाता सूची रा विशेष गहन पुनरीक्षण काम ने जारी राखबा री मंजूरी दे दी है। न्यायालय कयो के आयोग ने पुनरीक्षण प्रक्रिया रे दौरान आधार कार्ड, राशन कार्ड अर मतदाता पहचान पत्र जेड़ा मुख्य पहचान पत्रां ने मंजूर करबा माथे भी विचार करणो चाहिजे। शीर्ष अदालत मान्यो है के बिहार मांय निर्वाचन आयोग कानी ऊं कर्या जा रह्या मतदाता सूची रा पुनरीक्षण काम संविधान रा दायरा मांय है, पण अदालत विशेष गहन पुनरीक्षण काम रा टेम माथे प्रश्न उठावे है। बतायो जावे है के सोमवार ने सुप्रीम कोर्ट बिहार मांय आयोग रा विशेष गहन पुनरीक्षण काम रे खिलाफ दायर याचिकावां माथे तुरत सुनवाई माथे रजामंदी जतायी ही। न्यायालय मांय दायर केई याचिकावां मांय दावो कर्यो गयो है के गर विशेष गहन पुनरीक्षण ने खारिज नी करयो जावे है तो इण सूं मनमाना ढंग ऊं बिना उचित प्रक्रिया रे लाखों मतदाता वोट नी दे सकेला।

000

केंद्रीय कार्मिक, लोक शिकायत अर पेंशन राज्य मंत्री डॉ. जितेंद्र सिंह जन शिकायतां रा निपटारा रा तरीका मांय घणा फेरबदल करबा ने कया है। वे कया के नागरिकां री संतुष्टि खातर शिकायतां रो निपटारो केवल निपटान ताई नी व्हेणो चाहिजे। आज नई दिल्ली मांय एक राष्ट्रीय कार्यशाला ने संबोधित करता थकां डॉ. सिंह कया के म्हा ने शिकायतां ने नीतियां अर प्रशासनिक नियमां मांय खामियां री पिछाण करबा रा मौका रा रूप मांय देखणो चाहिजे।

000

मुख्य सचिव सुधांशु पंत कया के सिंगल यूज प्लास्टिक सूं सेहत, जलवायु अर जैव विविधता माथे बुरो असर पड़े है। वणा इण ने काम मांय लेबा माथे रोक लगाबा ने कया। श्री पंत आज जयपुर मांय सिंगल यूज प्लास्टिक रोकथाम टास्क फोर्स री बैठक मांय बोल रिया हा। वणा अहलकारां ने रोक लगायोडी प्लास्टिक ऊं बण्या सामानां ने बणाबा अर बेचबा माथे करडी कार्रवाई करबा रा निर्देश दिया। मुख्य सचिव अंतर्राज्यीय परिवहन रे जरिये व्हे री सिंगल यूज प्लास्टिक री पूर्ति माथे रोक लगाबा सारू परिवहन अर वाणिज्य कर महकमा ने रणनीति तैयार करबा ने कया। वणा न्यारा-न्यारा महकमा ने लोगां मांय इण बाबत जाग जगाबा रा निर्देश दिया।

000

राज्य रा मिनरल ब्लॉक्स अर प्लाट्स रा सीमा निर्धारण सूं लेर खान परिचालन समेत सगळी जरूरी जानकारीयां अबे **राजधरा पोर्टल** माथे मुहैया करायी जावेला। खान महकमा रा प्रमुख शासन सचिव टी. रविकान्त बताया के इण जाणरियां ने **प्रधानमंत्री गतिशक्ति पोर्टल** सूं भी जोड़यो जावेला।

000

गुरुपूर्णिमा रे मौके आज प्रदेशभर मांय गुरुवंदन कार्यक्रम राख्या जा रिया है। न्यारा-न्यारा जिला मांय धर्म गुरुआं रो सम्मान करयो जा रियो है। कार्यक्रम मांय राज्य सरकार रा मंत्री, विधायक, जिला कलेक्टर या वां रे कानी ऊं नामित अहलकार मौजूद रह र गुरुजनां रो सम्मान कर रिया है। इण मौके माथे मुख्यमंत्री भजनलाल शर्मा आज भरतपुर रा लुधावई रा हनुमान मिन्दर रा संत रो पूजन कर वंदन करया। इण सूं पैली वणा डीग जिला रा पूछरी का लौठा मांय ई संतां रो सम्मान करया। इण मौके वणा प्रदेशवासियां ने गुरु पूर्णिमा री बधाई दी। वे कया के गुरु जिन्दगी मांय प्रेरणा देबा रे सागे रास्तो भी दिखावे है।

श्री शर्मा श्रीनाथ जी मिन्दर परिसर मांय पेड़ लगा र पर्यावरण ने बचाबा रो संदेश दियो। देवस्थान महकमा रा मंत्री जोराराम कुमावत अर भाजपा प्रदेश अध्यक्ष मदन राठौड़ पाली मांय गुरु वंदन कार्यक्रम मांय भाग लीना। डूंगरपुर रा बेणेश्वर धाम मांय बड़ी संख्या मांय श्रद्धालु देव दर्शन खातर पूग्या। संत मावजी री जन्म री ठोड साबला मांय भजन कीर्तन राख्या गया। जैसलमेर रा प्राचीन गजरूप ठिकाना, बाईजी आश्रम समेत मठां मांय हवन राख्यो गयो। अठे सुंवारे सूं ही बड़ी संख्या मांय भक्त दर्शनां खातर आ रिया है। म्हाका भरतपुर खबरनवीस रे मुजब भरतपुर मांय न्यारा-न्यारा आश्रम अर मठां मांय गुरु वंदन करयो जा रियो है। सिंज्या ने भंडारा अर प्रसादी रा कार्यक्रम व्हेला।

000

प्रदेश मांय आज केई ठोडां माथे मेह बरस्यो। हनुमानगढ़ मांय सुंवारे सूं ही रिमझिम मेह बरसबा रो दौर चाल रियो है। राजधानी जयपुर मांय कुछेक ठोडां मांय छितरायो मेह बरस्यो। श्रीगंगानगर मांय सुंवारे सूं ही रुक-रुक कर बारिश रो दौर चाल रियो है। सवाईमाधोपुर मांय दोपहर पाछी व्ही बिरखा सूं मौसम सुहावणो व्हे ग्यो। इण सूं लोगां ने राहत मिली।

मौसम महकमा रे मुजब लारले चौबीस घंटा मांय सब ऊं बत्तो 16 सेंटीमीटर पाणी अजमेर रा नसीराबाद मांय बरस्यो। कोटपूतली मांय 15, अजमेर अर बहरोड मांय 11-11, सीकर रा फतेहपुर मांय 9, पावटा, मंडरायल अर किशनगढ़बास मांय 7-7 सेंटीमीटर मेह बरस्यो। प्रदेश मांय हाल ताई सामान्य सूं 102 फीसदी बत्तो मेह बरस चुक्यो है। वटी ने बांधां अर तलाबां मांय पाणी री चोखी आवक बण्योडी है। इण सूं 23 बड़ा बांध 70 फीसदी ताई भर चुक्या है। मौसम महकमो आज जयपुर, अजमेर, कोटा अर सीकर समेत 27 जिलां मांय बारिश रो येलो अलर्ट जारी करयो है। वटी ने काल सूं दक्षिणी-पूर्वी राजस्थान मांय बारिश री गतिविधियां मांय बधोतरी रा आसार है।

000

धौलपुर जिला रा सैंपळ मांय पार्वती नदी मांय नहाबा रे दौरान आज चार युवक डूब ग्या, जिण मांय सूं तीन ने बचा लियो गयो, पण एक युवक रो हाल ताई कोई पतो नी चाल्यो है। पुलिस अर स्थानीय गोताखोर युवक री तलाश मांय जुट्या है। बारिश री वजह सूं पार्वती नदी मांय पाणी री बधती आवक होबा सूं यो हादसो व्हीयो। वटी ने जैसलमेर रा पोकरण हलका मांय काल नई मंगोलाई गांव रे कने खाडा मांय डूबबा सूं चार टाबरां री मौत व्हे गयी।

000

भारतीय वायुसेना रा फ्लाइट लेफ्टिनेंट ऋषिराज सिंह देवड़ा री पार्थिव देह आज सेना रा खास विमान ऊं सिरोही हवाई पट्टी माथे लाई गई। अठे सूं उण ने वां रा पैत्रक गांव पाली रा खिवांदी ले जायो गयो, जठे सैन्य सम्मान रे सागे वां रो दाग कर्यो जा रियो है। बतायो जावे है के काल चूरु रा राजलदेसर मांय लड़ाकू विमान जगुआर रे दुर्घटनाग्रस्त होबा सूं ऋषिराज वीरगति ने प्राप्त व्हे गया हा।

000

भारतीय वायुसेना मांय अग्निपथ योजना रे तैत अग्निवीर वायु भर्ती खातर ऑनलाइन पंजीकरण काल सूं सरु व्हे रिया है। रक्षा जनसम्पर्क अधिकारी लेफ्टिनेंट कर्नल निखिल धवन बताया के इच्छुक उम्मीदवार इण बाबत् 31 जुलाई तांई पंजीकरण करा सके है। वे बताया के 2 जुलाई 2005 सूं 2 जनवरी 2009 रे बीच जन्म्या अविवाहित पुरुष अर महिला उम्मीदवार इण भर्ती खातर पात्र व्हेला। इण खातर 12वीं कक्षा पास उम्मीदवार आवेदन कर सके है।

000